

**QUISTIONI A BOCCA DI MATTEA LACAVE**  
**A NOME DI U GRUPPU FEMU A CORSICA**

**OGGETTU : PULITICA CULTURALE**

O Sgiò Presidente

Avete palisatu a vostra brama d'assucià u CESC à e decisioni maiò di a nostra assemblea è cusì propiu ci aggradisce ancu à noi. Di fatti, ci pare di primura per a demucrazia chì l'istanze previste da a u Statutu Particulare di a Corsica cunducanu, intere è sane, e missioni chì li sò cunferite da u legislatore.

Macaru, sapete chì ciò chì face u valore di e miglior istituzioni hè u valore di e donne è di l'omi chì e cumponenu. In cunsequenza, vi pregu d'esse attentissimu à l'almanacchera di e liste di l'organisimi chjamati à indittà i so ripresentanti in senu à stu cunsigliu, è in particolare quella di u cullegiu di a cultura.

Di fatti, u Statu hà delegatu in totalità stu duminiu à a nostra assemblea in u 1992. Face dunque un bellu pezzu avà chì a so percezzione ùn currisponde più à a realtà di u terrenu è chì a so visione amministrativa vene fundata solu nant'à una valutazione dinamica. S'hè avvizzatu à mette à paru associ chì ùn anu micca, o ancu chì ùn anu più attività, puru senza avè dichjaratu a so dissuluzione, cun quelli chì, elli, sò attivi è chì i vostri servizii cunnoscenu bè. Hè d'impurtanza capitale ch'ella sia cunsultata a nostra cullettività inde sta prucedura.

Sei anni fà, n'emu misuratu u risultu. Si sò affaccati certi, carchi à precure di persone finte, è, per fine, sò stati designati da u Prefettu di Corsica. Hè per quessa chì oghje, vi dumandemu di fallu capace in quant'à u risicu d'una designazione cuntestevule di i futuri membri di u CESC chì si feria torna senza nisun cunsultazione di i servizii di a CTC, specialmente quelli di a Cultura è di a Lingua corsa.

Segondu fattu di primura : sapete chè n'emu sempre à core quella vuluntà forte di megliurà a cuncertazione, a cunniscenza mutuale è ancu l'armunizazione quand'ella abbisogna. À parè nostru, vene indispensabile di creà e cundizione ottime d'eserciziu di quella respunsabilità maiò chì hè stata devuluta à a nostra assemblea : vulemu trattà di a cultura.

Cunsideremu chì i sei membri annant'à i cinquant'unu ch'ellu conta u CESC ùn bastanu à ripresentà sanu sanu u mondu culturale. Vi dumandemu dunque di chjappà l'iniziativa di a creazione, in Corsica, d'una « cunferenza di u spettaculu vivu » u più prestu pussibile. Puderebbe accoglie, omancu una volta à l'annu, l'attori di terrenu, l'eletti di e principale cullettività territoriale, è i servizii cuncernati. Cumpletterebbe à ghjuvare u dispusitivu, è permetterebbe à a nostra assemblea di cunsultà cunsigli cusì utili in stu duminiu delicatu.

À ringraziavvi, o sgiò Presidente, di facci sapè u vostru parè in quant'à ste pruposte.